

Wilhelm Senoner y l raport persona-natura

Pra la giarida dla mostra "L ritm dl vester" de Wilhelm Senoner iel unì sottrissà l raport danter persona y natura che vèn ora te na maniera sterscia dai lëures dl artista de Gherdëina

Ert - Wilhelm Senoner ie n artista che reprejentea y proa a dé pea te si cultures l raport danter persona y natura. Pra la giarida de si mostra "L ritm dl vester", davierta nchin ai 20 de utober tl Zënter Typak a Urtijëi, à l assessëur provinziel per la cultura ladina Florian Mussner sottrissà chësta caratteristica nteressanta y mpurtanta d'ert de Senoner, juntan pro nce l aspet culturel: „Per mé ie la persona, la natura y la cultura na unità, coche l vèn ora te na maniera autentica dal'opres de Wilhelm Senoner.“

La forma plu auta dl ritm

Nia mé opres bele cunesciudes y nce metudes ora pra mostres nternaziuneles, ma nce na reprejntazion nueva dl lëur "L bos" iel da udëi pra la mostra a Urtijëi. La curadëura Elena Filippi sottrissea la posizion dl ritm tl'opra: „N possa amiré y ntënder l ritm de marueia dl dé y giapé: un fossa zënza senificat zënza l auter. Forma y cunténut se



Lëures de Wilhelm Senoner.

anconta tlo tl cunzet d'armunia, che ie la forma plu auta dl ritm nstës.“

"Murfrëit!" y l'opra a Bad Ischl

N ucajian dla giarida dla mostra

"L ritm dl vester" iel nce unì prejentà l liber "Murfrëit! Ert - Stirpa n vita"; tl originel tudësch "Murfrëit! Kunst - Lebendige Spur".

L liber conta cun truepa fotografies, mprescions y zitac dla mostra de Wilhelm Senoner che ie



Truepa jënt ie unida ala giarida.

stata sun Jëuf de Frea dan doi ani.

Sëuraprò à la curadëura Filippi nce lecurdà l'opra "Èl cun scude/ Dragon de papier" - tl originel tudësch "Mann mit Schild/ Papierdrachen" -, che ie da udëi mo

nchin ai 17 de setëmber tla Vila dl Coser a Bad Ischl, tl'Austria. L lëur ie n lecort ala fin dla Prima Gran Viera sun la Grupa dl Pasubio, sun l cunfin danter la provincies de Vicenza y Trënt. (usc)



Wilhelm Senoner, amez, cun autoriteies y esperc.



"L bos" ie un di lëures da udëi pra la mostra "L ritm dl vester" de Wilhelm Senoner, tl Zënter Typak a Urtijëi.

HOTEL DA CUMPRÉ

Tla Val d'Isarch vëniel vendù n hotel ***S cun 80 liec. Sajon da d'inviern y da d'instà. Pusizion panoramica scialdi bela.

L ie na mpreja che possa mustré su zifres nteressantes n cont de prejënzes sëuranuet y de bilanz.

Nteressei possa scrì a: HGZ-Zeitung, parola „Hotel“, streda Schlachthof 59, 39100 Bulsan o tres email a: Kleinanzeiger@hgz.it.